



Cu participacion di Aruba, Boneiro y Corsou

Concierto di musica Folklore ABC a tuma luga

ORANJESTAD - Den e weekend di 14 y 15 di maart 2015 Aruba a drenta historia como e prome isla cu a organisa e Intercambio Cultural di Musica di Folklore esta un Concierto ABC. Esaki un comunicado di prensa ta informa.

Riba medionan social, por a nota varios comentario tocante e concierto aki. Ta parce cu hendenan tabata sumamente impresionada. Un comunicado di e organizacion ta conta cu esaki tabata un concierto di nivel musical, di presentacion artistico y di capacidad organisatorio

fenomenal. E concierto aki a wordo organisa den cuadro di 10 aña di existencia di Fundacion Mi Cutisa (FMC).

E concierto

E concierto a habri diasabra anochi cu presentacion di Wesley St. Jago di Boneiro hunto cu su banda Sabor Crioyo. Un agrupacion cu ta consisti di 16 integrante, di cua mayoria ta hoben di mas of menos 20 aña. Peser cu nan a maleta a keda Boneiro y alarma di Cas di Cultura a bay durante di nan presentacion, esakinan no a strobana di duna un presentacion bon structura y fantastica-mente hinca den otro, e organizacion ta subraya.

Boneiro a logra duna un presentacion unda e publico por a scucha e ritmo y mira mesora ta con ta balia e musica cu nan ta tocando. Mayoria hende na Aruba no tabata conoce Wesley St. Jago y tur hende a keda sorprendi di mira cu di berdad Wesley ta di mesun taya cu Ced Ride di Corsou y Jossi Brokke di Aruba. Ced Ride a presenta musica di folklore den un bachi clasico. Un bunita presentacion cu cancionnan completamente nobo. Ced a cambia su estilo di ritmo y letranan.

Si antes e tabata tin como titulo "Mi n' kier bo mas", segun Ced awe su composicionnan tin un draai positivo den dje, manera "Mi bon amigonan". Aunke Ced no por a keda sin canta su cancion: "Mi no kier bo mas" y scucha henter sala canta hunto cu ne.

Dedicacion na baluartenan

Jossy Brokke a dedica su rep-



ertorio na nos baluartenan di musica di folklore di Aruba cu ya a bay laga nos. El a dedica su presentacion na Hildward Croes, Hubert Booi, Bernadina Growell y Don Ramon. E cancion "Pais" di Jossy Brokke mes y "Cunucu di Suit" di Don Ramon tabata e favorito nan durante tur dos anochi.

Na final tur tres artista hunto a presenta e cancion "Abo so" di Padu del Caribe. Hunto cu tur e boluntarianan di FMC, tur integrante di tur 3 isla, tur hende a subi stage cantando "Abo so". E tabata un momento hopi emocional, pa mira tur hende y particularmente hobennan di tur tres isla hunto cantando y tocando.

Invitadonan di afo

For di Boneiro tabata presente Sra. Ally Pourier-Beukenboom, afdelingshoofd di SKAL y henter directiva di Kas di Kultura Korsou a bini Aruba special pa presencia e prome Concierto ABC aki.

Ninotszka Vicente y Ivan Felipa, dos trahado di Kas di Kultura Korsou tambe a bin tuma nota di e forma con FMC a logra realisa e intercambio cultural aki. Tambe tabatin algun miembro di directiva di Fundacion Ced pa semper presente. Hunto cu FMC tur e personanan aki a intercambia di idea. E siguiente Concierto ABC lo tuma luga na juli e aña aki na Boneiro. Esaki tabata e primicia di un proyecto asina bunita.

Manera Bon Dia Aruba a publica prome, Den cuadro di celebracion di 10 aña di existencia di FMC, e organizacion cultural aki a firma un protocol hunto cu Fundacion Ced pa Semper di Corsou y Fundacion Sabor Crioyo di Boneiro.

Intencion di e proyecto aki ta pa organisa un concierto cu musica di folklore di e tres islanan cu un presentacion di e tres cantantenan ya mencionada. E concierto lo mester wordo presenta na tur 3 isla. □



Pabien Mi Cutisa cu concierto ABC 2015



Den cuadro di su 10 aniversario, Fundacion Mi Cutisa a organisa e di prome di serie di 3 conciertoonan ABC 2015 den Cas di Cultura. Mi persona tabata tin e honor di

a fungi como maestro di ceremonia pa e eventonan aki.

Aruba su folklore tabata representa pa Jossy Brokke Jr, Boneiro pa Wesley Sint Jago

y Corsou pa Ced Ride. Dos sala bon bendi a aplaudi cada cancion folklorico cu a wordo presenta.

Mi admiracion y respet pa sr. Jossy Brokke Jr. cu a duna un momento homenahe na mi tata Addison Croes dfm. ta mas grandi cu nunca. Na nomber di mi famia henter, mi ta felicita mi cutisa cu nan 10 aña y yama un danki grandi pa e honor duna na mi persona pa presenta artistanan di oro di Aruba, Corsou y Boneiro.



Dos publico amabel y alegre cu a gosa di hitnan manera: "Locura di Dalia", "Mi no kier bo mas", "Pais", "E cuero dje Cabrito", "Remailo", "Cunucu di Seit" y demas cancionnan. Tur acompaña pa bandanan All Star (Jossy Brokke), Sabor Krioyo (Wesley Sint Jago) y Folklore

(Ced Ride) cu coronan cu bos di oro.

E publico di diasabra y diadomingo a gosa inmensamente di un concierto caminda e folklore di Aruba, Boneiro y Corsou tabata central! Concierto ABC lo wordo ripiti memey y fin di aña 2015 na Boneiro y Corsou. □